

MINORANCIS: E PARTÌS TE ASS5 LA CAMPAGNE ARLEF "PUARTE A CJASE IL FURLAN"

Udin, ai 21 di Fevrâr – E je partide in maniere uficiâl vuê, tal repart maternitât dal ospedâl di Palme, la consegne ai neogenitôrs di "Puarte a cjase il furlan/Porta a casa il friulano", un kit di materiâi utii e gadget divertents par sensibilizâju su la eduzazion bilengâl dai frutins a pene nassûts.

Il progetto al è stât realizât de ARLeF-Agjenzie regionâl pe lenghe furlane e de Aziende paï Servizis Sanitaris n. 5, cul contribût de Fondazion CRUP. Ae consegne a jerin presints il president e il diretôr de ARLeF, Lorenzo Fabbro e William Cisilino, il diretôr gjienerâl de ASS5, Luciano Zanelli, e i miedis e lis infermieris dai reparts cjapâts dentri tal progetto.

La iniziative e fâs part dal progetto plui grant "Infanzie plurilengâl" che al previo deve, sore de produzion e de distribuzion di materiâl informatif, ancje la organizazion di moments formatifs di pueste pal personâl sanitari.

I numars dal progetto " Infanzie plurilengâl" a son impuantants, sei pal numar di struturis sanitariis cjapadis dentri, sei pe cuantitât dal materiâl dât fûr. La iniziative di fat e cjape dentri i reparts di ginecologie e di pediatrie dai ospedâi di Palme e di Tisane; l'Urp dal ospedâl di Palme; i trê consultoris familiârs de Basse; i trê centris pes vacinis di Palme, Tisane e Çarvignan.

A saran dâts fûr 20.000 depliant informatifs, 1000 kit "Puarte a cjase il furlan" e 2400 confezions dai dvd dai dissens animâts par furlan "Omenuts" (a disposizion tai centris pes vacinis).

Tal detai, tal kit "Puarte a cjase il furlan" si cjate il test "Crescere con più lingue. I consigli degli esperti. Le opportunità per i bambini e le loro famiglie" (la traduzion in lenghe furlane si podarà discjamâ dal sit www.arlef.it); il DVD "Pimpa par furlan"; il librut "Cjantis e rimarolis paï frutins", un bavarin e un adesif pe machine.

I promotôrs dal progetto a àn sielt di organizâ la prime consegne uficiâl juste ai 21 di Fevrâr, zornade proclamade de UNESCO "Zornade Internazionâl de Lenghe Mari" cul fin di promovi e tutelâ dutis lis lenghis feveladis tal mont. La date e je stade sielte tal 1999 in memorie dai 21 di Fevrâr dal 1952 cuant che a Dhaka (vuê capitâl dal Bangladesh) i students che a dimostravin pal ricognossiment de lôr lenghe, il Bangla, tant che une des dôs lenghis nazionâls di chel che in chê volte al jere Pakistan, a forin copâts de polizie.

ARC/Elisabetta Pozzetto